


三聖心經

風陵文庫

文庫19

F306



玉皇心印妙經

上藥三品。神與氣精。恍恍惚惚。
杳杳冥冥。存無守有。頃刻而成。
回風混合。百日功靈。默朝上帝。
一紀飛昇。知者易悟。昧者難行。
履踐天光。呼吸育青。出玄入牝。

若亡若存。綿綿不絕。固蒂根深。
人各有精。精合其神。神合其氣。
氣合體真。不得其真。皆是強名。
神能入石。神能飛形。入水不溺。
入火不焚。神依形生。精依氣盈。
不凋不殘。松柏青青。三品一理。

妙不可聽。其聚則有。其散則零。
七竅相通。竅竅光明。聖日聖月。
照耀金庭。一得永得。自然身輕。
太和充溢。骨散寒瓊。得丹則靈。
不得則傾。丹在身中。非白非青。
誦持萬遍。妙理自明。

Blank manuscript page with vertical lines.

孚佑帝君訓世心經

帝君曰天生萬物惟人最靈人為靈寶。心是靈心。心為主宰。一身之君。役使百骸。區處羣情。物無其物。形無其形。稟受於天。良知良能。氣拘欲蔽。日失其真。此心既失。此身亦傾。欲善其身。先治其心。治心如何。即

心治心。以老老心。治不孝心。以長長心。治不悌心。以委致心。治不忠信。以誠格心。治不信心。以恭敬心。治無禮心。以循禮心。治無義心。以清介心。治無廉心。以自愛心。治無恥心。以積德心。治為惡心。以利濟心。治殘賊心。以匡扶心。治傾陷心。以仁慈心。治

暴戾心。以謙遜心。治傲慢心。以損抑心。治盈滿心。以儉約心。治驕奢心。以勤慎心。治怠忽心。以坦夷心。治危險心。以忠厚心。治刻薄心。以和平心。治忿恚心。以寬宏心。治褊窄心。以傷身心。治沉湎心。以妻女心。治姦淫心。以果報心。治謀奪心。以禍患心。治

鬪很心。以正教心。治異端心。以至信心。治
大疑心。以悠久心。治無恒心。以始終心。治
反覆心。以施與心。治慳吝心。以自然心。治
勉強心。以安分心。治非禮心。以順受心。治
怨尤心。以推誠心。治猜忌心。以鎮定心。治
搖惑心。以中正心。治偏袒心。以大體心。治

細務心。嗟乎人心。不治不純。如彼亂絲。不
理不清。如彼古鏡。不磨不明。如彼烈馬。不
勒不馴。我故說經。欲治人心。人心得治。天
地清甯。

偈曰

一切惟心心最危

觀音心經
範天圍地發光輝
天心即在人心見
人合天心天弗違

般若波羅密多心經

凡誦諸經畢俱宜唸
心經以蓋之

觀自在菩薩行深般若波羅密多時。照見
五蘊皆空。度一切苦厄。舍利子。色不異空。
空不異色。色即是空。空即是色。受想行識。
亦復如是。舍利子。是諸法空相。不生不滅。
不垢不淨。不增不減。是故空中無色。無受

想行識。無眼耳鼻舌身意。無色聲香味觸
法。無眼界。乃至無意識界。無無明。亦無無
明盡。乃至無老死。亦無老死盡。無苦集滅
道。無智亦無得。以無所得故。菩提薩埵。依
般若波羅密多故。心無罣礙。無罣礙故。無
有恐怖。遠離顛倒夢想。究竟涅槃。三世諸

佛。依般若波羅密多故。得阿耨多羅三藐
三菩提。故知般若波羅密多是大神咒。是
大明咒。是無上咒。是無等等咒。能除一切
苦。真實不虛。故說般若波羅密多咒。即說
咒曰。揭諦揭諦。波羅揭諦。波羅僧揭諦。菩
提薩婆訶。

願以此功德。

普及於一切。

誦經保平安。

消災增福壽。

南無救苦救難廣大靈感觀世音菩薩

三稱
九叩

